

四庫全書

集部

欽定四庫全書

集部

東江家藏集卷十八

詳校官監察御史_臣龔驥文

中書_臣劉源溥覆勘

總校官知縣_臣繆琪

校對官編修_臣周瓊

膳錄監生_臣李培賢

欽定四庫全書

東江家藏集卷十八

中集十四

明 顧清 撰

北游稿

序二十四首

送司業羅先生序

往歲庚申上特詔起前南京國子祭酒致仕謝公于天
台以禮部侍郎掌太學事其明年以翰林編修臨海周

君朝振為司業以佐謝公起前福建按察僉事致仕金華章公以為南京國子祭酒謝公章公宿學名儒恬於寵榮未老而歸休士大夫望之若山斗然周君端重謹慎馳聲館閣有年矣命下之日廷中翕然相語以得人且以為兩監諸生賀方是時章公始居憂上固未之知也及公具疏辭上閔然為虛其位而擇可南京國子司業者攝監事以須南監不除司業若干年亦特命也於是編修泰和羅君允升以德以才輟於講筵受任以往

命下之日廷中復相語以得人且重以為南監諸生賀
時壬戌夏四月六日丁未也既閱月壬申翰林及春坊
諸公張宴于院中閣老而下皆賦詩以送而以故事俾
清序其端清觀上之起章謝二公於山間固不謂在廷
之絕無人也以為俗降而竄士習由之假二公之風操
以振起其頽靡也及章公之未至則又申舉舊章咨於
近列而特以命君蓋將以望章公者望君而豈尋常之
任使比哉易曰通其變使民不倦又曰易窮則變變則

通通則久今學校之政其可謂倦矣義理未足以養其
心而利祿且有以撓其志壅遏衰遲計日望仕無恠乎
士習之日靡也其亦將至於窮矣以愚所聞蓋必有以
作而新之使士志定而恥於外求然後可以融而通之
使賢不肖之各止其分至於率之而行倡之而應則又
有在於品式規程之外者而不論夫夏楚之威也君其
謂之何哉清於章公後進也於君與朝振同年也序以
送君蓋私為榜中慶而思以輔君且將以聞於章公而

不自知其愚也於乎君尚無使清為徒言哉

送劉推官序

始吾居鄉見入之有爭者羣造乎里胥而辨焉從而聽焉其曲直瞭然也已而里胥者或左之或右之類不稱其所言問之則曰噫某賄也某勢也某與某不若也當時固已歎之少長游邑庠見有辯於有司者其曲與直亦瞭然也而有司者之左右之或不異於里胥而乃或甚焉私心竊自憤以為里胥者亦民耳里無人焉強提

而置諸其上其材識猶民也而又誅於賄與勢其若是
宜也彼有司者何人哉推於鄉選於州閭羣而養之於
黌序既成而賓之以興於春官其及等者為進士不及
猶所謂鹿鳴之賓也歷試而官之豐廩祿以奉之榮其
名而尊其身民之視之豈與夫里胥者等哉里胥者不
能平其訟而至於有司謂其能直之也而或反不里胥
若焉彼誠何賴而奉我哉近天子之居猶有能走而立
乎肺石之上者偏州下邑望帝城如天上雖部使者或

終身不得面焉孱愚之民有鬱抑而死耳爪牙之利者
不勝忿則起而為吾敵矣凡今嶺海之區鳥驚而獸駭
者其情狀雖不必盡同要之拂其情而無以服其心往
往多起於鬪訟普安之事是已不公其心平其氣以戢
吾民於庭除几席之間俟其憤而與之相挺於溪山千
里之外幸而克之而所以損於國者無窮是豈非有司
者之責哉西江劉堯舉以春秋試禮部七舉而不第就
吏部選得瑠州推官推官獄訟之司也而瑠州在大海

中去京師萬里真所謂望帝城如天上者其地民夷雜處雖今王化遠被而終異乎中州司刑者以為遠而不加之意焉或舉而倒置焉憤而弗洩亦何所不至哉故予因長史王君之請贈舉所見以規之而不以頌云夫州邑者一鄉之積也萬里者一州之積也推乎鄉可以驗之州通乎近可以達諸遠他日海南之民曰劉侯不鄙夷我民而以直待我也互相戒以無犯於有司則予言其與有榮乎

送濮先生序

國子監丞之設蓋始於隋唐掌輔祭酒司業判六學之政令學生之業成者同祭酒試上于尚書宋制兼掌錢穀至國朝委錢穀于典簿而丞專督察糾繩之政凡六館士有不如學令者得舉而罰之祭酒司業之欲有罰者必付焉其職清其權重隱然風紀激揚之任而非徒談經術司講授而已故丞得其人則士戢教行祭酒司業可不勞而化成非其人則或亢而戾或隨而靡有力

倍而功半者矣然則丞之任夫豈小哉當塗濮先生延芳以詩經教太學三年擢南京國子監丞先生學老而富行端而確蓋嘗卒業成均而始受學官其在官四主文柄周流齊晉閩浙之區而復官于成均所諳歷多矣所謂亢而戾靡而隨與振紀綱而輔化源者舉在其目中矣南雍久虛祭酒之位近者羅太史允升受命為司業士大夫拭目以觀而復得先生為之丞南方之學者其有翕然而丕變者乎羅君之往也予以文送行先

生行而助教王君汝楫復俾予為序凡今學校之政與
時俗之弊變通之宜予送羅君已畧陳之矣故特以丞
之職事所當為者為先生言之先生與羅君其尚終相
與以有成哉

風帆秋興序

風帆秋興圖一幅詩若干首櫟居杜君及吾鄉縉紳為
信之南歸而作信之以屬予為之序信之初入京即受
知於陽武侯薛公將奏置其家塾中遭間阻往返于江

湖遲回於京國者十餘年而事乃克合其可謂難矣信之之初返而來也其內人殞于途再至而失其愛子零丁匍匐於憂患中身不膺一命家不霑寸祿而拮据綢繆酬對人間事不廢平居會聚畧不見其困瘁可憐之色而終以有成其又可謂難矣成之難故其涉於世也滋熟處其難而後濟則所以居之者必靜重而不搖譬則寒澗之松老圃之菊閱春秋於幾變淩風霜而始花榮名之加乃感慨之所集也豈與夫走馬看花盡長安

於一日而以詫其鄉人者比哉予少與信之同入學至
于今二十有五年信之歸興之高諸君能言之櫟居能
圖之而若此者則予深知之而他人或未之及也信之
觀此其亦將有感於中哉

送張元春赴山陰尹序

壬戌秋紹興之山陰餘姚台州之黃巖皆以闕尹告三
邑之縉紳咸願得才賢以幸其鄉人而未有所屬也山
陰鄉進士宋君元溥與進士張君元春為同舍生知君

之賢誦言于鄉人於是閣老木齋司成方石兩謝公皆欣然欲得之而亦未有所定也既兩月除目下則君之名儼然在山陰山陰之人轉相告以為慶且以慶宋君而兩邑之縉紳皆悵然如有所失宋君以其事告予且屬為之序予聞古守令之賢有政成還朝而民不忍其去者矣不聞未至而先望其來也有改邑未行而民爭於兩界者矣不聞未仕之先廟堂之公卿交相與欲之而不得者也張君舉進士未踰年其言論其政事皆未

有所試徒以宋君一言而山陰之人慕之餘姚黃巖之
人復慕之爭欲寄君以百里之命得之者喜而不得者
以為嗟君誠何以獲是於人哉古之君子修于身行于
家孚于鄉鄰而信于朋友故名揚于王廷而人不以為
誇政施於初而民信其終之不謬何者其所養有素也
若張君豈其人乎哉吾未識張君而觀諸公之慕之可
以占其賢至於稱人一言而鄉邦先達交信而不疑又
以見宋君之不凡也故樂為書之雖然子產之相鄭也

一年而謗之三年而誦之方其謗也不知其可誦也及其誦也則忘其謗矣今君未至而入先慕之又從而張之以文辭吾竊懼其終也夫懼其終則必思所以慎其始而勉於後斯足以保其初此吾之所以為君告也有所感而為善固非所以待天下之賢然負縉紳之望而求以稱之亦分內事也君尚無使宋君之愧其鄉人哉

送司業周先生展墓序

周先生朝振既得請于上歸展其先塋六館之師生與

朝之卿士榮先生之有是行也相與作為詩章歌詠其事既已極其盛矣行之日翰林諸舊僚以方有講事不得餞于郊也復使清為之言清少讀孟子書觀先儒論君子之三樂而竊有說焉敢即以叙先生別蓋先儒之論以為父母之俱存兄弟之無故與得英才而教育之者一係之于天一係之于人其可以自致者惟不愧不忤而已如清之愚則謂士類之依歸誠非可強而所以來乎是者則必有由天命之修短誠非人所能齊而在

我所當為則有可以自盡是故天之弗我與人之弗我歸吾不敢知而修吾身以致吾誠者則不可以是而自委也先生少侍先公長史宦學于四方幹譽承顏所以娛奉于膝前者既無不盡而律身行己無一毫敢愧于天人暨登翰林職清近聲稱日隆而愛士禮賢有若饑渴縉紳之嚮慕欣欣焉遂升國庠貳大司成為章縫之領袖先生之所得亦侈矣顧猶有可言者先公先宜人違棄頗早養成國器而昂霄聳壑之勢一不及見焉此

則先生之所歎焉而春雨秋霜不能無感於終身者也
然自先生之有是圖也吾以為左師之地百責所關殆
不可以一日虛者雖有請且不遂也而疏封朝陳溫旨
夕報士大夫聞而助之喜焉侈之詩而歌詠焉豈不以
先生之所懷獨在於是體孝子之深衷而成其盛美者
哉先生於此亦足以少慰其平生矣然吾又聞之君子
於親之存也致力于孝而推以忠吾君於親之歿也致
力于忠而圖以顯吾親蓋其致孝也固將以為忠而其

為忠正所以成吾孝也先生去鄉十年而始有此歸瞻
零落于山丘問閭里之存亡豈能無睠顧之懷誠念乎
是則又有不敢以濡遲者矣暨歸以申吾孝而亟來以
致吾忠此友朋之至願諸公之同情而清之所以為千
里別也先生其念之哉

送張縣丞序

吳越之間會稽山陰鏡湖剡溪之名勝甲于天下而人
才亦從之有自宋元至于今詩書簪纓相望不絕如一

日者是雖其人之賢而扶輿清淑之氣蜿蜒磅礴之所
鍾夫亦豈可誣也錦衣千戶謝汝容剡人而世宦于燕
敦詩說禮鄉人之自南來者多主焉有張君克敬者以
太學生出貳江西之贛縣汝容為之求贈言道君之賢
而因及其家世則固所謂詩書簪纓相望而不絕者也
蓋君之先有登宋乾道進士為兵部尚書者有以進士
參議制司公事者入國朝則曾祖孟韜以明經薦于鄉
其尊人軒以鄉進士同知兩淮鹽運事江淮之人至于

今能道之至君復以才丞巨邑自兵書以來四五百年之間世代有隆替職位有崇卑而書香一脈綿綿延延若斷而復聯將墜而復振此其故豈偶然哉縣之有丞所以貳令而出政以養吾民者令賢矣復得賢以為丞則一邑之人蒙其福不然則或撓而紛或抗而沮鮮不敗乃事者顛之令吾不及知而丞乃得君政其當有成乎夫自尚書參議而視一邑之丞其相去遠矣然以君子言之則一命之與公卿其求以及人一也而況韜翁

之積學未施都運君之施而未竟君雖不有顓之民其
不有尚書與參議乎不有尚書與參議其不有韜翁之
與都運君以為剡山水之光乎詩曰無曰予小子召公
是似吾以是卜君之丞顓其政當有成也故因汝容請
而序以期之如曰吾之位若此雖自立其焉知則今之
畫地者皆然所為丞不負余而余負丞非余之所敢聞
也

家譜序

吾家久為農譜牒散落不可知可知者自祖居華
亭不他徙其詳亦不可得知可知者自吾高祖福
一府君而下福一生貴一貴四貴一生秀一秀一生文
理是為吾父而貴四無傳吾兄弟二人汝伯祖文用又
無子故以吾承祀吾先世居縣西南九子涇至福一始
遷于城西見遠橋之南而其弟福五仍故居今日賢曰
仁者吾四從兄弟也蓋吾宗自是而分為二吾父祖以
上雖不甚讀書皆樂善循禮義以清白相承吾曾祖母

李性嚴有識操治家斬斬鄉人教子孫視以為法凡吾家無惰游之男無治容之女吾兄弟平日不敢出一惡言至老不敢為一不善事得全其家皆先訓所及也清時雖幼蒙猶能一一記憶大父卒清年益壯念家無載乘恐久愈湮沒子孫不及知恒切悚懼而方役心章句為程試計未暇也既忝科第居京師酬對人間事碌碌如昔弘治壬戌以去親久將圖歸省惕然興懷不敢寧用敢以所聞於大父及所知者次第譜之譜始於福一

示有徵也福一之後詳書而其弟則否示有宗也凡得
姓系本不書以吾祖所不知不敢強附焉以為當世譏
也雖然君子之澤五世而斬吾福一府君而下至吾祖
為五世自吾祖而別傳吾父至吾孫又五世矣吾父布
衣躬耕以直誼聞于鄉而吾祖之懿行尤著後之人因
是譜而溯其所從即其所以告清者味其詞氣而倣像
其行事必不忍縱驕奢以墜厥家而吾福一公之胤可
衍於無窮又安知無元歎彥先者出吾宗以為斯譜之

光哉嗚呼此亦吾祖宗之意也

送史同知考滿序

侯在郡逾三年將書最銓曹有袖詩一卷示予者曰此蘇之人思侯之為令不可得而形諸咏歌也今侯政成入京韓公所謂將羽儀天朝而不復幸吾民也決矣蘓人去侯而猶思今幸且留也而弗知敬事松尚為有人乎於是盛稱侯之美政而指其大者曰去歲夏秋旱苗穀槁死知郡劉公方如京民無所控訴侯力贊攝守何

君上其事朝廷悉從之璽書勅撫臣舉荒政德意甚厚
侯之力也及春撫臣至議所以賑貸者侯又力贊劉公
速其事民聞當發廩皆忍饑以待國無流亡又侯之力
也其陳便宜于監司曰今之論者知重國而不知重民
不知重民即所以為國又曰寧使稅有闕而不充不可
使民饑而死其論江南直隸不蒙拯卹曰此皆有司知
稅賦之為重而不知民隱之當卹急忽坐視奏報失時
之所致此又近世有司所深諱而不肯言者而其通融

漕法區處賑濟又皆應宜切事鑿鑿可行與夫蠟貌施
言專為身而罔他恤者萬萬也故願因侯之獻績斷吾
子之一言庶當路之有聞焉而知所以處侯無使他日
為蘇人之悵望而徒言也予始識侯於吳門知侯之長
厚而已及還自京師聽田夫野老所以誦侯者乃遠過
其素今客之言視田夫野老加理而核焉如使言之而
當路者聞之吾恐侯之果不復得幸吾民也而又可乎
哉於時光祿少卿陸君而下皆為詩送侯推予為之序

念終不可以已也故具錄客之語以冠於篇端而不復顧其私侯名俊字景賢燕之漁陽人成化甲辰進士也

海山清勝詩序

南起於吳越北至於青齊綿數千里皆左環瀛海右帶羣山宦轍之所經商帆之所歷堪輿職方丹青竹帛之所紀載會稽雲門洞庭金焦北望琅琊極於岱宗而東接於三韓倭奴流求扶木之墟夷亶之洲其高山風雨其遠際天地環瑋而謫恠曠漭而汪洋皆可以目寓而

神往者其間靈鍾秀毓為大貝為明珠為三品之金鉛
松孤桐橘柚之苞絲漆之供鹽絺蠟蠶杭稻之饒生人
之所資殆遍於天下其聚而生人物則為季札為魯連
為嚴光為魯兩生漢三傑為洙泗之羣英而師表百王
垂憲萬世如吾夫子者實於魯而降靈焉為履之遺塵
宮墻之餘址丘園邑里風煙草木之輝光固儼乎其如
在也豪傑之士際昌期宦名邦聲動於諸侯出而當陶
冶人才之任以其尚友千古之心先憂後樂之志而馳

騁於其間其感乎心而發之事也豈止太史公汗漫之遊而已哉三山傅先生以易經教華亭三年而校文於西江又三年而受齊聘縉紳皆以詩送行而吾內弟任生明善求為序惟先生風節之高問學之富衡鑑之精固已不待稱述而知贊說而能者吾獨羨茲行有以窮天下之大觀以會聚其精誠而得入之盛果超越於後先也乃為題其首曰海山清勝而序以期之先生公事畢駕輶軒登越觀之峯望匹練之餘暉試仲尼之所以

問顏淵者果然與否其將指蒼茫而笑曰彼有人焉惜乎其不吾俱也

吳國風謠序

宜春劉侯治松之六年為弘治甲子九月戒行將朝明年正於京師郡博士餘姚汪君本侯之德政賦詩一章擬歌于祖道以示其同官於是司訓臨安唐君繼之司訓會稽朱君又繼之司訓關西閻君江右殷君復繼之以示于諸生諸生毛節等退而相謂曰侯之行先生咸

有言吾輩其可以無述於是節倡之溥和之元金臯銳
等又相屬而和之總為詩若干篇題之曰吳國風謠而
持以示予予受而讀之曰美哉和而正邇而理婉而有
遺音吳之風其若是美乎古者天子巡狩會諸侯于方
岳命大師陳詩以觀風而因以考其國政之美惡加黜
陟焉故其序曰治世之音安以樂其政和亂世之音怨
以怒其政乖亡國之音哀以思其民困言民各以其情
發之於歌謠情有苦樂而音隨以變焉而其國之政令

可從而知也封建廢而為郡縣此意不行於天下久矣而吳之風若是其侯之化乎學校風之首也推之一國其有不然乎蓋其言之和以正也可以觀士風之淳美此教之及也其言之邇以理也可以觀民隱之畢達此政之致也其言之婉而有遺音也可以占他日之去思此愛之結于民心也美張堪者不詳其治燕之績而但稱麥秀之歌美廉范者不詳其治蜀之績而但稱五袴之謡是詩也雖未登于太師之簡有得而觀之亦豈待

履侯之庭而後知其為賢守哉牧尹高第入為九卿兩
漢制也諸侯來朝燕以蓼蕭錫以采菽成周之制也聖
天子稽古重民其有以待侯之來矣為序詩也故不敢
以佞云

春苑看花詩序

春苑看花詩者邑博士傅君用享將鎖廳試春官章縫
之士賦以為君贈者也君初以易經薦其鄉為第一人
過省不利用乙榜例來教于華亭故事舉人領學政再

考有成績者得試于禮部君在任六年清節雅量為一時冠場屋薦士視常格不啻三倍而典文外省以得人稱者亦再矣進士之科唐人重之謂之白衣卿相釋褐之日賜期集費燕于曲江遍遊名園由宋以來傳為士林盛事此非徒以榮其身重得人為天下計耳夫求得人以為天下計則如君者豈非有司之所急而諸君之歌詠豈無意哉走馬東風盡長安之花於一日孟郊所以為詩人也與聞喜燕而不戴花同年規之乃簪一花

司馬君實所以為醇儒也然則士大夫之望君與君之
自待有出於斯言之外者矣袁君澄夫屬予序此詩予
方念無以為君贈也而喜於挂名為即其首簡而書之
如此宮袍初試回首上林君其有感於予言哉

送姚先生赴南安序

予童巾時從令涇國長史任先生學先生以文豪一時
賓客甚盛然至論學行純備則必以姚先生程夫為首
稱先生至必肅衣冠敬禮之加等當是時予心已竊識

之既冠入邑庠因得從先生後觀其言行信然凡先生有言於人無弗信有所託無弗響應者曰姚先生誠信人也下至於市里亦然蓋十四五年間未嘗見其有失色于人者予既忝科名而先生猶連蹇場屋同時之士不能無舛望而先生澹焉如平時每書入京師和平謙厚無幾微動於詞氣者其經學之純深文翰之雅潔自得雋于時者未能或之先也故予慨然太息以為如先生而不偶于時天道有弗可知者弘治甲子始以久次

貢春官授江西南安學訓導南安於江西為名郡重以
吾鄉東海張公之化而山川之秀所以鍾為人物者猶
鬱而未昌近歲乃有以掄魁薦于鄉者而今又得先生
為之師意者天之屈先生固將有待焉使大展於是邦
以佐成聖天子文明之治邪傳不云乎以身教者從先
生之修于身者備矣其御于家行于鄉亦既無弗從矣
西江千里吾恐南安之士猶未習先生之風也故因諸
公之贈行而序以先之先生至不言而化行則予言其

猶贅也

嶺表澄清詩序

昔漢冀州盜起以范滂為清詔使使按察之滂登車攬轡慨然有澄清天下之志一時所部自知賊污皆望風解印綬去州境肅清范史書之至于今想見其風采執法之吏出按州郡者人必以是期之吾松貳守吳君蒞任之六月盜起南方大司馬東山劉公特薦君拜廣東按察僉事專敕備邊松守宜春劉侯合同寅賦嶺表

澄清詩以贈蓋有取於滂也然吾觀滂之受任在漢末
於時海內已亂澄清未幾而羣小咻之志竟弗遂其視
吳君生聖朝遇知己進得以行其志退無所累於心蓋
相去懸絕非滂所敢望也而侯獨有取于是則亦以其
入言之而時非所論已矧方今天下雖無事而疆場之
守亦未盡得人嶺海之間去京師萬里風霆之威日月
之光容有所不及焉包匭刻版以失民人之心而因以
召亂者固不謂其無之也當是時而有如滂者出其間

以當一道澄清之任百城之吏有不聞風而震疊而山
搖海蜚歌珠還而頌乳復之不暇又何弄兵於潢池之
有哉若吳君蓋其人已大司馬選於衆而舉君宜春公
之取於滂以為君贈皆非苟焉而已者予故紬繹其意
而序之如此他日由嶺表而中朝且將為楊綰之服黎
幹而感汾陽如滂又何足慕哉君名廷舉字獻臣成化
丁未進士先世嘉魚而生於蒼梧熟知南中事當塗用
之非徒取其清也

琴堂永日詩序

豳風七月之卒章曰十月滌場朋酒斯饗曰殺羔羊躋
彼公堂稱彼兕觥萬壽無疆邠公貴為國君民忘其賤
而升其堂舉酒而稱壽其意勤其禮畧矣然而周家一
代上下相親恩意纏綿至久而不替東遷而後國既微
矣而民猶懷之眷眷而不釋則其源固出于此也後世
君日以尊臣日以卑堂陛之間等級斬然而情日以隔
絕平居無事惕於威刑奔走承迎雖無所不至而中實

判如一旦事變之來而渙然離者多矣識治之君子於二者之間其何所從也番陽張君宗周以進士令華亭其待民一以誠意寬平簡易見者無愚智少老皆得盡其情焉至豪猾姦欺亦無所縱捨而惻怛之意未始不行乎其間蓋庶乎古之所謂循良之吏者四月二十六實君初度之辰邑士錢穆諸章輩相與賦詩持酒為君壽君亦欣然受之不辭自周公作詩至於今二千有餘年邈而上之以至于邠公又千餘年矣以今準之其氣

象豈相遠也詩皆近體目之曰琴堂永日堂以指君之所臨而日以狀君之壽諸君之意深矣語曰化國之日舒以長四月長夏日日以永以君之政而合之天時皆有舒延之象焉諸君之意深矣抑邠民愛其君而不能自言至周公而始形諸詩微此吾無聞焉矣諸君身為之又親能言之使鄉邦之美由今日而傳播於無窮斯又邠俗之所無也是日也予方病不能出而諸君以詩屬為序予因得以挂名焉他日吾民歌去思頌甘棠國

史書之以繼中牟密尹之後使天下之人指而稱曰張君真循吏也庸詎知此言之非其張本哉

送王敬止赴嶺南序

今臺中故事御史滿三歲其同寅賀者必請序于翰林他省寺或不盡然者蓋盛舉也壬戌歲予當為王君敬止序未及稿而君奉旨按遼東明年予以憂去官君亦以職事被逮比至予已南彼此不相值君謫閩中而予方有事丘墓海鄉稀便人莫知其行蹤每一念君未嘗

不引領南雲慨然而歎息也乙丑予免喪而君再謫嶺南聞之流涕而君自蘓以書來方惓惓以不及弔予喪為深念以不得予文為大歎其詞委曲和平若初未嘗有遷謫事者予讀之竦然起立服君之偉度非長安初會之敬止且深自愧其不免於兒女子之情也是則君可賀之大者若夫歲月之磨勘階級之序遷直居官之恒事非所為豪傑道也是用輟前之述而易以贈今之行蓋君自為行人使外國潔清端敏固已竦動遐邇比

入臺直言正論時譽翕然其出按也刺舉激揚又人所甚難而不敢為者明主蓋深知之憂其銳而將至於折也故因事而抑之老其才以大其所受而君於此亦自知之其所以舒泰從容不自隕穫者固自有定見譬則慈父之庭訓孝子之受笞其心之孚感豈西臺南徼之所移而山靈海若知天子之近臣魚服於下土其肯使蟲蛇霧雨少襲君之衣屨哉然則君之行又有賀於他日者而區區離別亦不足為君道矣當時請序者趙君

金匱要略卷十八
克正而下凡十人不能詳亦不敢遺者本予言之所起也

送陳舉人歸莆田序

閩中自宋來號為南方鄒魯文學之士束帶結髮以功業自奮者恒倍於他州然以其地之遠也計偕而上踰連山冒重江擔簦躡屐勞與費亦倍於他州一舉捷禮闈登大廷歲固不數人也蹶而還復來則其勞與費又有倍於是者以故閩士之不偶者不入成均則遂領

部符教郡邑以俟再舉其能從容翱翔歸故鄉展庭闈之敬無反顧之憂者非高貲則宦族也陳君國英起莆田以明經取高薦方是時其尊人以前進士教華亭君之赴春官嘗拜慶而北也既下第束裝南來謝不敏外橫經質疑雍容於膝下者幾三月先生以母夫人之在堂也趣之歸自閩而北自京師而南華亭適其中君之往而來也輿馬僕從皆得以一息焉同君舉者不能皆然也息也得以親顏色於久違歸也得為先生伸望雲

之意同君歸者不能皆然也歸而繹舊聞益懋其藝能
踰暮而來則先生之試期已及扶輿而上接武而升汾
州在前居仁在後使天下之人指而曰莆田之陳世有
其人無忝於今之鄒魯也然則君之行其亦榮矣哉朱
君朝美合同憲為酒以送善繪者為之圖郡博士汪君
而下咸賦詩其上予東齋舊生諸君謂不可無言也故
序以先之

壽孫鴻臚六十序

吾松人士自國初來文學政事既表表于時而書法之精亦為天下第一其最承恩遇者二沈兄弟及孔易朱公而太常夏公以高才勁氣與三君者齊驅永樂宣德之間鍾王在前虞褚在後駸駸乎魏晉盛唐之風矣而其子孫又皆克世其業繼美于時沈公之後為故大理評事藻今中書舍人世隆朱公之後為故大理卿文徵中書舍人仲光獨夏公之學傳其壻王君存節存節傳其壻孫君用章雖若小異焉者而翰藻書香其嗣承猶

一日也用章當憲宗時以工楷法書金字藏經稱旨擢鴻臚序班供內職孝皇即位援例歸覲遂稱疾不起築堂架樓窮飾勝趣與鄉大夫仕而歸者日相從為文酒之會逍遙咏歌以樂太平至今上元正丙寅而壽始六十以天下之大國家之多士而絲綸之任此數家者子若壻世掌之嗚呼盛矣而恬於進取未老而能閒又有若吾用章者崑岡之秀其所產固多奇哉書稱皇建有極斂五福以錫庶民而壽為之首終之以攸好德夫福

必有德而後能致之必有壽而後能享之至於歛而錫
之則有本於建極之主而非人臣之所能為也用章簪
筆而升朝登金門趨玉階日食大官享天上之樂者餘
十年掉鞅名場尋幽貞之廬坐青山招白雲而引黃鶴
享林下之樂者又二十年神閒而氣充志定而骨堅踰
六望七以及期頤又未可以限量也若是者豈偶然哉
進以鳴國家之盛而退也怡神以永年皆士大夫所深
願而不可必得者兼而有之吾恐前之數公尚有羨於

君也正月十七實君初度之辰倪君廷威張君景和首
為詩以賀諸公聞而繼之皆仕而歸與君同樂太平者
其名德壽祉亦略相當尤非偶然之故也予故推本而
極言之以序之於首庶幾乎諸公者相引翼於遐年無
一日而忘吾君也正德丙寅上元日

思親詩序

古者諸侯分土而治王畿之內不過千里士大夫仕于
朝者例不出其鄉即有朝聘征行皆不踰時而返其國

父母兄弟宗族聚在目前祿奉賚予均及喜相慶戚相弔疾病患難相恤纓弁而入朝退而視膳愉愉也采薇之戍兩期而還則上之人為之閔惜憂傷不啻在已然而其事特見於多難之秋而平居固無是也蓋自罷侯置守以來始有萬里而從宦歷年而不歸瞻飛雲於太行感峻坂於邛崃者而其甚也乃或以官為家望故鄉如隔世而曠遠離別之懷於是為極矣古今之世變不同而人情所感亦隨之而異使其當天下為公之日如

前之所陳又曷為至此哉近制仕於京者兩考得省親
十年得展墓蓋所以體入子之情廣孝治之理而外任
則無之士出身領部符有官滿而不一至家者或親終
而仕委丘壠於族人而東西南北維所之春雨秋霜之
感又有不止如梁公者矣嗚呼此吾判府姚君思親之
詩之所為作也君成化庚子領鄉薦辛丑以乙榜授校
官滿考書最陞今職時厥考嵩菴公妣汪孺人歿既久
矣君之官寔顯祿寔豐年寔長而念其親益切士大夫

閔君之志亦樂為道之以洩其哀蓋自滄薊二州以至
于吾松二十有餘年所得詩自參政戴公師文及吾鄉
縉紳凡數十百首繼而作者不論可謂富矣而君猶以
為未足乃復以授予俾為之言夫人子之於親其愛無
窮而所以報之則為日有限臯魚之言痛入心膂千載
而下猶為墮泪而況身為王臣有四方之事所謂秋霜
春雨曾不若匹夫介士之得盡其情則諸公之作雖累
千百言猶不足以盡君之思也而況其止此乎蓋聖人

之訓以立身揚名為孝之終事而謂事親孝則忠可移
于君順可移于長君履官以來服素茹清蕭然如布衣
寒士而早夜孜孜惟職所當為者是力惟三尺法是遵
惟士大夫清議是畏所以保身全名顯其親於將來者
至矣吾以為此孝之實也其所以託於言者將時玩焉
以亂思而舒哀而非以為名也昔者戴公之言固已及
於此矣予故申為君誦之而遂以為序云

雪窻詩稿後序

雪窻吳君翼夫以詩名于松三十年自予知君亦二十
年矣山林日長無外物以撓其志故其言蕭散閒靜無
世俗綺麗脂韋揚衷倚市之態雖豪逸之氣間一發焉
而終不失其和平讀其言可以知其人也予歸自詞垣
君袖詩一編來謁蓋自予別君至是又十餘年矣所作
日富而言益老成又可以見君之德進也文人墨客不
遇於時者多矣其身不足計而跼蹐田里昌大豐縟之
氣無自以發焉而獨與田夫溪老相應和於山泉魚鳥

間以終其身是則深可慨也有如翼夫使得志當時者
易地而與之相上下夫亦豈多讓哉昔人謂詩能窮人
又曰必窮者而後工夫工拙在人窮與達乃其言之所
以異而非所以為工拙也高生進之始學於君而後從
予游是日在坐以予言為然請書之定菴序後且曰使
繼是而有聞焉先生之詩當不止於此也

虞庭獻續詩序

邑大夫張侯莅政滿三年當入覲闕下書績於銓曹諸

生岳銓等惜其行而無以留之也乃相與謀賦虞庭獻
績詩以贈以美其德政申其望思而舒洩其離憂謂予
當為序課試之法始於有虞書所謂三載考績三考黜
陟幽明者蓋自在廷百執事以至侯甸采衛凡位于民
上者罔不由之其立法簡而周其責效專而久其行之
也信而有常蓋萬世而無弊者周漢而下法日以詳而
敷言試功寢失初意至於我朝乃始盡復有虞之制內
外臣工率以三載為任三任九載通考而陞黜之高材

異能待以不次而經常之制守而靡忒重華立制而聖
祖行之百四十年以為家法則今日之闕庭雖謂之虞
廷可也侯初令貴池有聲改令吾邑以忠臣之心事其
上以古循吏之道治其下敬而不阿寬而有制當其簡
易庸夫孺子皆得以盡其情于前至是非之所在曲直
之所分生人休戚之所繫則雖臨之以勢怵之以威有
確乎不可奪者以是惠流政行大得民和而聲稱日新
使當虞廷詢事考言不在車服酬庸之等乎朝廷以有

虞之法課羣臣侯之政足以應有虞褒賞之制然則諸君以是而贈侯非諛也宜也當侯之始至也予方在苦廬予以病滯留而侯復書滿三年之間有以熟侯之為人而親見其行事矣蓋一日為令吾鄉人一日之福也故諸君之賦詩也眷戀之情每切於飛騰之望而予不讓而為序亦因以寄其私云侯名岐字宗周饒之番易人弘治壬戌進士也

壽山福海圖序

天地間物之至高大而永久者莫如海與山人之所深
願而不可必得者莫如壽與福崑崙而東暘谷以西其
高截浮雲翳星漢其大浴日月涵坤輿靜重而不遷淵
深而莫測有形之類蓋莫有幾焉者也而世之臣子祝
君親之福壽每有託於是焉何哉人之生也有限而臣
子之心無窮蓼莪之詩擬父母之恩同于昊天之恩極
猶未論夫海與山也推是心以祝君親之福壽則雖至
于是有不以為過者而況其未可以幾哉嗚呼此吾子

進陳先生壽山福海之圖之所為作也先生家莆田以
詩經教吳下時厥考訥齋翁歿久而母夫人林氏方在
堂樂其家園欲迎致而弗可而先生之心無一日而能
安也乃因其八十之年求善繪者為此圖徵詩于縉紳
寓鄉人歸以為獻夫天下之山莫多于閩中而莆田之
去海最近武夷壺公靈仙所居東望蓬萊西瞻羅浮雲
鸞笙鶴時縹緲于空虛而龍宮天池可俯瞰于几席夫
人生長于斯固有以孕其秀而鍾其靈矣而其寬洪謹

重寡笑與言與夫靜而不遷深而無際者其德復有類焉生稟其靈秀也德幾其靜深也而又有如先生者為之子體仁服義益其光榮則夫萃繁祉于厥躬享遐齡于期頤如山之高如海之洪豈非夫人之所宜有哉新圖有輝尺素萬里雲崖蒼蒼鯨波茫茫天晴日明懸之素壁夫人抱弱孫戲于屏間指圖而語之曰此若翁之詒我者則夫人與先生猶日聚一堂也而有不樂乎夫人之心樂而壽與福有不益隆乎此正昌黎公美先生

之鄉人所謂志養者雖其無窮者不盡乎是視夫登太
行瞻飛雲徒悵望而無及者寧不有羨於先生哉詩既
成諸君俾為序予謂序不足以重詩而因序詩以發孝
子忠臣之志則予之願也遂書之

薇垣秋月詩序

薇垣秋月詩者饒吾郡守今大參劉公赴陝而作也詩
作於郡中而曰薇垣者道公之所往曰秋月以識其時
也而諸君之望深矣藩省之號薇垣蓋始於唐以中書

為紫薇省植紫薇于閣前謂之薇省昔人嘗論其誤而元立行中省於各道因襲其故而稱之今之諸藩正名使司而猶曰薇垣又襲元之故也四時之氣於秋為金其氣獨清月為陰精得金而盛銀潢玉露宣發光輝而雄藩大邦城府壯麗廣庭清夜冰輪雪魄之光宜倍焉藩垣大臣旬宣撫鎮之餘臨高堂而坐明月列郡百城環拱內向民生之休戚吏治之否臧何者不在吾照燭之中乎有以燭之而不思所以處之乎陝西秦漢之故

都也金城天府壯大雄麗天下莫先焉而公之受命又
適當夫高秋月明之候因其行以想其所至則諸君之
賦詩也得無意乎哉吾觀陝西自十年來北地困於蹂
躪而么麼小醜時跳梁於西邊識者憂之已非一日哈
密之事是已近歲命大臣總三邊命憲臣修馬政潛籌
默馭蓋皆有深慮焉則所當思有重於他藩者而公此
行又專以督糧諸為職蠲煩苛提要綱內撫循其吏民
而外以固其疆圉使明主不勞於西顧焉此忠臣之志

而諸君之所望於公也豈待臨高堂坐明月而始入其
心思哉詩凡若干首貳守張侯什倡之諸縉紳繼之述
德昭庸備之矣予故以名篇之義發諸君所未及以爲
之先驅

海山鍾秀詩序

任城王肅之以浙江都指揮僉事奉勅備倭統揚州鎮
常蘇松等五郡緣海之地而開府於金山方是時君年
甚壯而主奠猶虛位也乃正德丙寅孟陬之月日在癸

已而適嗣生焉松守宜春劉侯聞而為之喜曰此山海之秀所鍾也首為詩以賀之而傳及其同寅暨松之能言者皆有作為既成以示予擬為之序而君提兵捕亂者海上憫其無知未忍即殺賊既平復留視其土撫寧其士民蓋久而後歸而劉侯有關西之命貳守新蔡張侯與君同事海上者既飲至還遂申以為請而卒劉之志焉予少讀詩書見自古人君德合于天而將大其國家則必為之生賢子孫以嗣其業而又錫之賢才使世

相承以為之輔佐殷周以來公侯之子孫光照簡冊而
詩入歌申甫之事方且推原本始以為崧岳之降神兩
漢之興去古遠矣而金張馬鄧之族綿延貴盛至與其
國相始終孟子有言所謂故國者非謂有喬木之謂也
有世臣之謂也夫使其君有世臣以紹隆其國家豈非
天命之有在而山川之秀會聚洩發應期協運亦孰云
無意於其間哉我國家以純德膺顯命天之眷佑深矣
王君之先以武功佐興業逮事文皇致位三品為時虎

臣其慶源遠矣君復以才能宣力南土十年之間八更
委任再陟勲階而謙抑退遜每進而愈恭有識之士固
謂其後之將大也而是子之生又適當夫九五龍飛歲
歷更端之首天之篤我明而錫之賢才使世相承以紹
隆我國家豈不在是而所謂山川之秀會聚洩發參天
時以符景運亦烏可謂無意者然則劉侯之倡始諸君
之嗣音豈一人之私一家之慶而已哉乃為申作者之
意序其首以歸之于君他日是子也登燕然臨瀚海而

歸畫於凌煙尚庶乎無辱于山海之靈也

平海功成詩序

元年夏六月巡撫都御史南昌艾公遣兵捕亂者于崇明天人和同文武用命不旬日而賊平元惡赴水餘黨咸就縛波恬風休舟楫順利自太倉崑山嘉定上海諸州邑村落宵防晝嚴曠日彌歲至是皆帖然於是商歌于塗農謳于田和而成聲遍數百里都御史鶴城張公謂此誠俊功也不可以無述取聞諸道路者節文之協

之音聲為平海功成詩以倡于縉紳縉紳從而和之積
而成巨編則以示子使序而傳之且將以為公賀清聞
古者命將出師勝捷而還則凱而入于國門以張武功
諸侯敵王所愾獻功于天子則天子為之歌彤弓以覺
報燕漢魏以來短簫橫吹朱鷺芳樹等曲皆其遺聲也
東南之民入國朝來未嘗見兵革樂生親上無意外之
思公來撫之視若赤子每以賦重役繁憂見顏色方將
會萃國計考見顛末力蠲苛政以垂永圖此其設心直

欲使吾民子子孫孫永享升平之福而豈樂以殺戮為威兵甲為功者夫惟不樂乎是至於不得已而後乃用之故往輒有功而民不久困公之德於吳人大矣然方其時公既不自以為功行伍之間又未聞有能言之士公位在中臺非諸侯奠一方之比彤弓之賜又無庸及焉獨以海隅之氓親被荼毒而目見其清寧歡舞長謠不自能已而又得吾張公輩品節而協和之以歌于士林然後公之功始得以槩見其一二而撝謙不伐之美

亦自隱然于其間則是詩也豈尋常謦頌說之辭之比哉夫公戮鯨鯢以靖一方而不以為功公之盛德也諸公者樂道人之善而言足以發之君子之事也故予不讓而樂於附名焉若公之存心如前之云其勲名所至有不止於一方者大書特書不一書予方泚筆以待而未敢多讓也公名璞字德潤初官職方練達戎務故其於是役也有不足辦云



東江家藏集卷十八

欽定四庫全書

集部

東江家藏集卷十九

詳校官監察御史_臣龔驥文

中書_臣劉源溥覆勘

總校官知縣_臣繆琪

校對官檢討_臣王鍾健

謄錄監生_臣任時瑞

欽定四庫全書

東江家藏集卷十九

中集十五

明 顧清 撰

北游稿

序二十五首

應天府鄉試錄後序

正德二年應天府鄉試錄成臣清以職事當序其後乃拜稽首而言曰惟我國家之養士百四十年于此矣高

皇帝始宅金陵戎馬未息而興學設科惓惓以得賢才
成天下之治為務一時武烈文謨巍然煥然照映今古
雖曰帝之神聖而諸賢之助亦多矣豐芑之詒于今益
盛聖子神孫所以翕受敷施以光高帝之業成無疆之
休誠不可謂無所自也夫人材惟其盛則其擇之也難
精而其取之每患于不能盡譬則沙中之金千百一二
則光彩照耀易以掇拾璫林大盈珍貝溢目應接不暇
則挂一漏萬亦勢使然也臣嘗聞之前輩之司文衡者

則亦病其然矣而臣生長畿甸亦四舉于是而後乃得之故知其難為尤真乃今奉命而來以校文為職凡前日之所謂盛者今皆得以接于目前而惟吾之所擇而前輩之所以為難者亦無所辭焉蓋喜幸之心不能勝戰兢之念而披閱之勤不足以釋鯨鱗之憂至于所謂公無私者則臣之分內而在所不論也今撤棘有期錄既成矣二旬之間搜珠于淵采玉于山亦自竭其力矣而臣之心猶未敢以釋然者高皇帝之作人始基于是

皇上即位求賢輟儒臣以司校理亦首及于是是固望其率先四方羅真才以為新政助也而南畿之士其文章又若是其盛也則臣安敢謂所取之必得而遺珍墜寶果無一二于山海之間乎雖然登名是錄者百三十有五人亦不謂之少矣臣又安敢謂無奇傑之才數人為出具間以應上之求者顧嘗聞之文之盛者實之衰而天下之事類非一於文而無實者之所能辦諸生之文盛矣聖賢經世宰物之學槩於此具焉舉而措之成

天下之治不難也其信皆所得乎故臣序錄之終篇而
三致意焉諸君者尚勉于其實而無徒以文為則有司
其有望焉矣場屋執事諸氏名臣珪之首序詳之茲不
複翰林院侍讀顧清謹序

送瞿太守序

三代之封疆其南不盡五嶺越裳獻白雉至重譯而來
其所經歷則今交廣雲貴之間也而在當時則以為絕
域矣天地間之風氣開發有時而聖人之教化其被也

有漸粵自秦漢以來至于今日而峨昌廢此諸蠻之所窟穴牂牁特磨窮山絕谷咸列為郡縣聯為編戶以自比于王人蓋聖神之功化於是為至而方州之吏宣布德意涵育而撫摩之其為力亦勤矣廣南之為府即古特磨道之地山高崖險其民多儂人故俗儉以約有鹽井之利故好鬪而爭司衡鑑者以其然也高資良材靳弗以授吏於是者又多以其遠忽之由是澤壅於上情鬱于下上下下之間日以扞格而昔之人所涵育而撫摩

之者幾至於不可收矣夫惜才之良不以寘之遠而使
國家之德澤不究于域中山谷之民已自列于王人而
不得與中州齒此其咎宜何歸而聖人一視之仁顧豈
若是也上海瞿君起東以前進士佐天府幾十年三州
二十七邑之民仰之若父母進參督府精敏練達太師
英國張公而下皆重之用是聞于銓曹書上最將擢用
君而廣南闕守告遂以君往夫以君之賢三州二十七
邑之民知之太師英國張公而下知之吏部復知之豈

不思偏州一郡不足以辱君哉其心以為屈一人使萬里之外知天子不鄙夷其民俾如君者為之牧也咸相戒以奉條教率禮服義不犯于有司與夫斬一人而隳疆場之績孤嚮往之心其利害固相百也然則君之行其繫于天下也甚大而可以濡滯乎哉禮部尚書張公天駿合鄉人咸賦詩一首題之曰萬里春風持以為君贈紀德言懷其為言備矣予故直道用人之意以速君之行

送曹太守序

天子在位之三年戊辰朝諸侯于明堂按國之故考其
殿最而陞黜之藩府廉車下及州縣顯績良才入為公
卿餘各以其資登進而臺諫之英郎署之彥自正月以
來相繼出外地望之高下事任之簡繁銓次掄擇司衡
鑑者視他日尤致精焉而吾曹君仲玉以工部郎擢廣
東之廣州守廣州在唐為嶺南節度府北扼五嶺地重
而大其南岸大海控制島夷以千百數昌黎韓子所謂

帥得其人則一邊盡治無寇盜賊殺外國之貨日至溢
于中國非其人則不幸往往有事者入國朝來諸州之
事統于三司雖非復前日之任而地當會府兵戎財賦
刑獄之政咸萃焉蠻夷無警歲時受事或有所咨議四
方之賓客日至館穀將迎於守乎責之境內之常職不
論也故名為一郡而事幾倍于他州非誠盡其心而老
于更事者不足以付司衡鑑者尤于此而致精焉曹君
以高才取進士為工部主事理漕河于山東三年不激

不隨人畏而愛之事以大集入理曹務為員外郎郎中
克舉其職以佐其長績用日章而端敏精慎終始如一
人望而知其為可信任者及當斯舉皆翕然以為宜將
行其同官徐君中行輩會餞于國門屬予序其事曹君
予禮部所取士也知之久喜其道行而望其有行副用
人者之心成天子之美政也故不讓而為之言

送陸子齊赴南京戶部序

弘治癸丑清初試禮部故少宗伯伯治齋陸公今閣老西

涯李公實主試事治齋得清文喜寘之上列出而延譽
于公卿甚力私第通名見其諸子所以獎借而教誨之
者尤至當是時私心竊自語幸得以鄉後進備門生之
列而公之德厚如此其何以報之未幾公捐舍館諸子
皆南歸不相聞者數歲然數聞士大夫稱道公家學有
傳而誦獎章子齊名尤習則又竊自喜公之有後而恨
其不一覩以快所聞也丁卯承乏考南畿士得詩經一
卷異之意其必名士及拆號則宛然吾子齊於是益信

嚮所聞之不謬而喜吾先生之果有子矣子齊亦以清
先公門下士而又得以文字交也相與日益親明年子
齊擢進士拜戶部主事分司南京都亭之餞公壻楊君
百川謂清宜有述夫以清之受知于先生若是其深而
子齊之於予其契分又若是其厚然則序子齊別非清
其孰宜之蓋吾聞良工之子必學為箕良冶之子必學
為裘箕之於弓裘之於冶其事異而理同也先生德業
聞望海內之人所倚以為公輔者而不竟其用天固將

大啟其嗣人而子齊果克以其學振起于後計司之任誠不若館閣之雍容然自昔名卿負經濟之具者未有不該綜乎此六條均節宣公所以告德宗者皆實學也以先生之用而未盡者發之于子齊以自昔名卿所綜理若宣公之告其君者委之於受任之始簿書之校理金穀之鉤稽叢脞糾紛酬接不暇者皆所以玉子齊而大其成也然則是行也其所基甚大而何閒劇之計於曹局彼此之間哉果然則繁弱干將又將自子齊出而

門下老生為先公喜者不孤矣百川起曰此正吾人所以為子齊祝者于是出巨卷書之追納于行李

送夏廷華同知濟寧序

予同年鄉舉士往往有名江陰二夏尤所謂傑然者如山既連得進士為省郎而廷華試春官輒不利往返南北踰十五年氣不少衰而學日益進吾每見春榜無君名未嘗不為有司惜而且愧其先之也戊辰試復不利銓次當得官衆且謂君不屑而君厭場屋矣於是同年

士參部就注者幾十人江君廷璧張君時震最先授君
次選乃得同知濟寧州衆又謂君且不憚而君怡然受
命無幾微見于色也將發朱君顯卿輩餞于城南有執
爵而起者曰廷華君早以文學名其薦于鄉年長矣五
戰于南宮而氣不衰名益振何其壯也舊選人上第例
得佐太府或作州次乃監郡縣令而君僅僅得一州佐
退就列無一言又何其怯也君笑未及應而予勦之曰
斯乃君所以為壯者夫行已制事有義而得失利鈍有

命義之所在委于命而自懈者非也君之所以百折而不撓也命之所在不以義而自制者亦非也君之所以隨遇而安之也衆人皆怠而我獨奮舉世方躁而我獨靜斯勇之大者而奚以怯云也然非獨此也廷華行且坐黃堂與太守可否事猾姦強禦一斷以法君必謂之勇矣仁以卹下而廉以律身鰥寡孤獨不敢侮而暮夜之謁恐恐然畏人知也君又以為怯乎衆於是謹然曰必如是而後為知廷華廷華必如是而後無負其所學

有光于鄉榜也廷華喜舍爵而拜樂飲而後罷明日顯卿謂予宜書以為送夏先生赴濟寧序遂書之

壽張朝振七十序

予初入京寓錦衣趙百戶希明家趙永平人也因識其鄉先生張君朝振于坐觀其舉動磊落不作儒生酸論事可否評隲古今人得失又歷歷可聽予心竊識之以為燕趙古稱多奇傑士茲其人哉時君方五十餘謝事家居京城子弟若錦衣指揮謝君汝容輩多從之學而

其子元亮已有名未幾擢進士拜戶部主事與汝容往來趙氏益習而君年益高杜門卻掃不復可得見矣丁卯予再入京君年已七十汝容乞予文為壽而元亮方居其母憂予辭之今年冬十一月汝容踏門曰文今可以作矣是月五日先生初度也予既感汝容之勤而又嘆夫流光之速乃作而言曰古之達人盖有以天地為一朝萬期為須臾自予識先生已十五六年由今思之猶旦暮事也以予視十五六年猶旦暮則先生年雖高

其自視平生亦奚以異哉方先生被褐衣論天下事賜
第策名拜大行人使萬里外國朱衣玉節光照海外蠻
君蠻伯俯仰道周其意氣何雄也已而掉名韉絕塵纓
收其身於萬馬馳驟之場而自放于青山白雲之外又
何其逸也然是二者於先生自視何如哉時雨將至山
川出雲雷驅霆轟汨陵谷而靈九土風止雲歛澄空寂
然豪傑之士其於是亦若是而已孰是而言其前者既
已若是則由今而往雖復更百年而事固猶旦暮也而

又奚以異哉昔者屈子賦遠游將求長生以觀反覆無窮之世變予序先生壽而有感於出處得失之間知達人之如一日也敢因汝容寓一觴焉先生以為然其將為予酬也

海嶠清風詩序

士之處世惟其無意于物而物自歸之吾徐起而受之夫然後受之者無愧而人皆信而服之而後吾之道可行于天下不然則雖其軒冕之巍巍權位之隆重威聲

氣焰燁赫熏灼而有識之士固望而鄙之矣而其中實
欲然俛仰承迎求以固其所有思其得之艱而恐其失
也而且望進焉此其中寧有一日之樂哉而況其能以
善吾政澤吾民而無負其所學也閩南李君士哲以前
進士為旌德教諭陞教授應天府由應天擢吾松推官
皆以才行見推未嘗有勢位攀援之力其在松盡心職
事訟者至為剖析情理歸于至當經君斷者皆自以不
究其律已嚴甚日用所須有仰于市者平直而取絲毫

無所苟焉廉慎之聲著于遠邇而君以母夫人年高日
謀歸養於進取泊如也李御史仲易按南畿將薦君君
以其鄉人也力辭之而懇以歸請仲易未許而後使者
堅留之剡章具矣而部符至以君判廣東惠州府由君
之所行以觀其所得豈有一毫覬倖于其間哉古之君
子不求有功不得已而功成故天下以為賢不求有言
不得已而言出故人以為口實若君之乞歸而得遷求
退而反進無所冀于物而物自歸之得不以為誇而失

不以為累也雖施之天下焉往而不達哉君之行也姚
君程夫率鄉人為海嶠清風詩以贈夫自松而閩自閩
而廣皆岸海之邦其間島嶼動以千百翠岑丹崖烟嵐
雲木皆君輿蓋之所經行而旌幢之所披拂也風之為
物觸于物以有聲而其聲又足以動物故昔人取以名
詩以君之行事而播之篇章其清風乎颯颯乎起東海
而薄于南海也炎烟瘴雨之鄉有不灑然而清泠者乎
詩以贈君而目以是其有以稱斯行矣故為序之以見

無慕於外其氣象有如此且以壯君之志使無改於歲寒也

古文會編序

古文會編者監察御史黃君希武之所輯也其書蓋萃文選真寶關鍵諸編之精者而一之故謂之會編初君為庶吉士讀書翰林時則有此志而未果既官內臺奉敕董南畿學政乃以其意授應天府學教授洪君敏及諸生某等緒成之既則以授吾郡守臨川民望繡諸梓

以傳布諸郡曰將使里巷童蒙一展卷而得古人立言之法區區時文雖無事焉可也而以其首簡屬予序予謝不敏而君之請益堅則著其所以而系之言曰兩漢三代以前天下之文章一而已齊梁而降科目興而偶儷之辭作韓歐諸大家力起而變之終不能盡而時文與古文遂並行于天下場屋之利鈍進取之得失繫焉於是排比日工而古之道或幾于喪矣雖然雕蟲篆刻誠壯夫所不為而其傳于今者緝麗弘演猶察乎其可

觀也惟我國家文治蔚興無愧前古而科場習尚識者
猶或病之至於書肆版行鈔選輯錄之類則自有時文
蓋莫甚于今日者矣唐之弊也得韓而興宋之陋也得
歐而振雖不能盡而古道至今存黃君斯舉其有二公
之心乎以天子之近臣秉司文之衡鑑指麾之下風草
靡然而又蒐輯前聞著之簡冊以明示所嚮思皇多士
有不翕然而一變者乎而走也辱與聞焉以挂名其編
首雖學植荒落無以追往哲之蹤而所望于吾人則深

矣今而後青襟濟濟熏班馬香而嗣周誥殷盤之響則先生之志遂而亦豈非予之願也哉黃君名如金閩之莆田人陳君名威字民望與黃舊同官雅尚文事故其就斯舉也甚力云

岳氏家慶圖序

岳君器之家慶圖成以示予屬為之序引予因得寓目焉層樓華軒蔭以嘉樹烏紗銀章儀觀偉然而坐乎其
中者尊翁光澤君也翟冠霞衣儼乎如賓而相向者夫

人趙氏也器之及其子洪玄巾藍袍拱而立于左其弟
用之明之率其子洋宦輩奉酒與肴趨而入于右僮奴
訢訢各供乃事若將為君與夫人壽者而二老人齊榮
並美安坐而享之人間之樂其有踰於此者乎聖人以
壽歸仁者而語其體曰靜推其所喜好曰山光澤君之
名仁人之所好也而自號以艮堂則其志可知矣少以
春秋舉進士累不第而志弗遷及宰光澤改廣昌誠心
待民庭無貳令而兩邑之民皆安之荐丁家艱遂卧弗

起杜門却掃處塵市若山林則其人又可知矣良而止也靜而有常也仁之事壽之基也則其與夫人齊榮並美坐乎一堂而享子孫之奉夫豈其過者抑器之積學而文其子姪又多秀穎行將躡亨衢跡芳塵以君所未盡發者而施之於時則夫逆天休而延寵光以為君與夫人壽又有大于今日者方是時宜有高文洪筆發揮其事而何止予言雖然為岳氏慶其自今始也光澤君今年六十八以六月廿日生趙夫人年六十七以七月

十有三日生而諸子以君生辰并為夫人壽云

鈴閣春深詩序

吾郡守喻侯子乾以成化壬辰二月二十有五日懸弧矢於蜀之內江後二十有五年當弘治丙辰以明經登上第出宰湖南還朝為省郎為御史敷歷中外又十有五年而當正德辛未剖魚符來守吾郡方是時侯年甫四十神清而明氣壯而銳若鏡之出匣鸞刀之發鉏而博大溫良視物之在前無敢有或易者始至承大歎後

公私匱乏天復亢旱侯致其精誠禱而得雨歲乃大熟
流亡來歸征稅畢出閭里熙然復有樂生之意而煦育
撫摩侯之勤亦至矣郡之耄倪樂歲之康感侯之仁拊
舞謳吟未有以發也而適聞侯初度之在茲辰則相與
謹曰斯不足以言乎於是教授江西彭君鍊教諭蘄水
張君頌而下率其諸生倡于學宮風于邦人而鈴閣春
深之詩作矣古之君子任天下之重處崇高之位功在
於社稷澤被于生民詩人歌之不及其他而惟祝以壽

蓋祿位與名皆君子之所宜有惟壽則其於道也久而
及于物者深其傳于後者遠雖君子於是無庸心焉而
人之情固以是為至也侯之年方壯而未艾千里之任
未足以盡其才郡閣雖深嚴要非侯之久居也諸君以
壽祝侯而必目以是意豈異于古哉四時之氣惟春最
和故在天為元而在人則為仁二月四陽氣之中和之
至也而侯生於是博大而溫良元之德仁之量也而侯
以之本其生以觀其所履則夫迓天休延寵光由一方

而天下以至于無窮如古詩人之頌又何足異者且夫
坐鈴閣之下當春深之候庶事理而民和訟庭空而無
譁予以延賓僚稱壽觴咏清香畫戟之篇賡臺萊杞李
之章農歌遠聞絲竹間作今日之會非盛德其何以來
之彭君以詩序屬予予亦抃舞謳吟中之一人而未有
以發者為即其首簡書之使觀于是者知詩人之深旨
非徒以壽言也

崇溪春意詩序

棠溪春意詩一冊凡若干首松之人士賦以為貳守王
侯贈同賦者劉君文瑞謂予未有言且職史官宜為序
棠溪者本西蜀之水名府之別館有水焉環其東南實
類之前守眉山黃公平顧而樂之曰是吾家溪也因取
以名之且以名其館所謂棠溪書院者是也書院為府
之倅貳職清軍者之所居有山石亭臺之勝當春之和
花卉競發禽蟲下上林影波光交暎互徹入其中熙然
忘歸不知其為城郭官府也諸君之名詩意其在此乎

則自有書院以來至于今經幾春自眉山至于侯居此者幾人矣昔無述而今有作且以為侯贈詩人之意其殆可思乎名區勝地自有宇宙則有之而景與心會者十不一二江山人所樂也或對之而隕涕花鳥人所悅也或感之而增悲谷風之和舒遲日之暄麗朱門之與蓬戶一也吾松自古稱富饒郡而近數年來旱潦相仍饑饉並作殍流之氓逃亡之室所在相望而侯之始至適當其時清心以檢身約己以繩下凡可以拯吾民者

絲毫無所容焉而又跋履郊廛出入阡陌為之築隄防
䟽壅滯以備患于未然蓋庚午辛未之間侯之無寧居
者幾半歲而田事一新天亦悔禍歲乃大熟雖侯之謙
虛退弗敢承而四境之內飽而嬉暖而游觀霖淫而弗
恐者其中固瞭然矣故前乎此之崇溪未嘗無春也而
若罔聞見今日之崇溪春非異于昔也而歌咏興焉彼
一卉木一禽蟲之類果足以盡諸君之意哉一卉木一
禽蟲不足以盡意而諸君之意實于此發之則是詩也

乃碑而韻者而可視以為流連光景之作也初侯既畢
田事即董漕入都至彭城得旨而復今當得戒行新舊
兩漕為粟數十萬鼠竊未靖衆皆為難之而侯挺然就
途曾不畏阻蓋心乎為公故隨事而有立如此率是而
行將所至皆春而何止崇溪也侯名卿字維賢陝西咸
寧人成化丙午貢士云

吳氏雙慶圖詩序

新安吳棟卿既卒業太學歸省具父存和母孺人鄭氏

於其家將圖所以為之悅者過吳門造其友文君徵明而告焉徵明欣然拂絹素為作雙慶之圖且歌以揚之諸君從而繼之吳素多文士徵明又其最也翰墨之精丹青之妙絕出一時而棟卿悅親之心於是乎著矣棟卿舉于鄉予時在場屋有一日之雅焉因持以示予乞為序予曰然子之所以悅其親若是而已乎吾嘗觀子之家乘矣子家運幹公早學晚仕澤止一鄉東臯翁漆指科名終隱弗售同知路判君惠澤在人而仕亦弗顯

所以積之者深矣文禎以來畜德靡耀至于存和敦樸
儉勤稱良于鄉而又得孺人以為之助所以培之者亦
不薄矣而直于吾子焉發之然則子之身其所負何如
也而所以悅親若是而已乎雖然吾聖人之訓以揚名
顯親為孝之終事而子雲氏推孝子之心以日之不足
而愛之人之情亦孰不欲務其大者顧時之未至吾亦
難以預期而隙中之駒且不為吾親而少憩也則隨其
分而致吾情焉亦豈非君子之所與者存和君今年五

十四鄭孺人今年六十中鵠之鄉龜溪之原良田足以給賓祭華屋足以備燕休清池茂林足以笑傲而游衍也而又有佳子弟如棟卿者歸自京華奉觴膝下展新圖於高堂詠諸君之雅篇曰此皆某平日之交游也則所以樂其心怡悅其志豈有待于外哉棟卿學富而才良他日之功名殆未可量與夫瞻飛雲而太息過峻坂而興憂則其所得視今日為孰多而孝子之心寧為彼而遺此邪然則棟卿其無以前言而自沮哉

松江府志序

予往歲憂居前守令都御史宜春劉侯琬嘗屬以志事
會予北上不果正德己巳予復以憂歸明年庚午御史
弋陽謝君琛按部來松問府之故病其遺闕嗣守臨川
陳侯威復舉以屬予冬始即事而侯以春去予意其終
弗果也會今守內江喻侯時繼至力主成之府始為縣
時有雲間志既為府屬嘉興見嘉禾志直隸省後有松
江郡志有續志入國朝有松江志有雲間通志通志者

會諸志而成書者也雲間志歷歲久遠今已無全書其餘雖存而後生之得見已鮮通志所取又間有脫訛更後數十年遺文墜蹟將無復討尋矣故今並取諸本參互考證會以成編而不敢畧焉通志以後則續之事見他書而諸志所未及者補入之其間卷第之先後類目之分合事辭之易寘取合倫例與便檢閱蓋稍異往編而大率皆其故也至於推原變始考見得失因事寓規間亦有之而罔敢以意參焉嗚呼郡之志猶國之史也

昔人有成論矣史不為天下萬世而私于一人是之謂
曲筆志不為一鄉與後世亦豈逃士論之公今茲纂輯
蓋歎焉惟淺狹挂漏貽誚于大方是懼日月滋久參質
為艱而梓刻成矣敢述所懷布諸簡首後有作者即具
具文加之黼藻以成一郡之書豈惟寡學之幸亦前後
諸公所以屬望之心也志為卷三十二為目三十一目
之下又有目焉凡十有七卷始終暨圖目為版九百十
有六居之郡閣備散逸也同事諸生與郡之僚屬贊襄

於是者並列名左方壬申冬十月初吉

賀陳都指揮序

七年夏官軍敗羣盜于山東又敗之于河南其得脫者
入於江將闕三吳於時陳君汝玉以都指揮僉事備倭
駐金山聞變提兵出江上而官軍亦踵至君協規同力
殲之狼山八月師還士友畢賀張君拱辰離席而言曰
君茲行有可賀者二而功賞不與焉昔君先祖父朴菴
公自金吾調温州其官指揮使也其後以討賊功陞僉

浙間事領曹京師坐謫復起以功名終君之初官亦指
揮使也既而以材武稱亦選僉浙間而破賊江上功亦
無忝焉朴菴之謫也居金山數歲吾松之人多識之君
之來儒雅練達松人謂真朴菴孫而又有今日之事朴
菴雖沒而其道可謂益光矣斯可賀者一也夫君之功
固朴菴有以啓之也而朴菴之道至君而益光君能繼
朴菴而光其道矣而君之事又未止于斯也繼君而起
者人有不拭目而觀之邪斯可賀者二也乃相與賦光

前啓後詩以為君賀而屬予引其端朴菴在浙江識太守張公澍之于未遇其詩太守實序之在金山與東海張公游最習唱酬甚富其起於謫也平江伯陳公寶薦之汝玉之初官已為縉紳所推許閣老木齋謝公尤器之具薦以備倭則大司馬東山劉公皆一代之偉人也傳曰達視其所舉又曰觀遠臣以其所主朴菴之祖孫予於是有所以知之矣拱辰之請序也楊太學美之實偕來二君皆松之俊也是又足以徵之矣而予於此且有

說焉乃不辭而併告之曰霍去病以匈奴未滅而不顧其家馬援當南征據鞍顧盼以示可用疆場之多虞固忠臣之所扼腕也今北河雖靖而鄖襄饒睦之間事猶有可憂者君於此能無意乎拱辰謂君之事不止於斯也而予亦以為然其啓後具光前且有大焉而所未知者君之誠有意乎否也二君歸其為我問之正月十五日序

海天晴畫詩序

去年春吾郡守喻侯壽四十一邦人士之能言者賦鈴
閣春深詩以賀予既為之序矣是月既望邑博士王君
文昌與其同寅廖君軼張君朝儀合謀舉故事更賦詩
曰海天晴晝而復以序屬予曰子故自吾學升且侯所
善也不可以複辭于時賦者方操觚予未得而徧觀也
獨取其名篇之義而繹之以為羣玉之先驅夫海侯壤
地之所漸也地之瀕海者多風而沮如下濕少暘而多
雨在吾鄉為甚春夏之交則又其甚也海天當春而遇

夫晴晝則其風日之妍麗景象之和淑人情物意舒泰
怡懌蓋有非言語之所形容而丹青之所能狀者侯之
生辰既惟其時而自履任以來陰沴消匿陽和宣暢年
穀屢豐而今歲之春淒風不興零雨應節雨必以夜曾
無崇朝鄉人父老皆相慶以為此樂歲之徵治平之象
也則諸君之賦詩而寄興于此者豈空言哉前日之詩
曰鈴閣春深本侯之所居而言也今日之詩曰海天晴
晝本侯之所御而言也坐鈴閣之深春撫海天之晴景

時平而百物熙人和而頌聲作侯于斯時觀天人之感
孚思休徵之所自寧不亦莞然而一笑邪曩之序固謂
侯方壯而未艾千里之任不足以盡其才鈴閣雖深嚴
非侯之久居也信斯言也則海天之間晝雖甚佳麗豈
侯之所能長有哉予也方將有北轅徘徊鄉邦欲行而
復止者彌月因得及侯之生辰而為序是詩又恐侯之
果不久于斯而震風凌雨有以敗吾稼而撼予廬以為
南望之憂也故其於是也尤睠顧而不能已云雖然師

尹日也卿士月也所處崇則其所徵召也益大侯方自此而羽儀于天朝其為晴晝也將遍于天下而豈獨海邦哉

風木興思詩序

人之情莫不欲終養其親而親之年勢不能與子同久亦莫不欲厚其親之養而人之富貴恒不於壯年劬苦於孩提而不見其成長膝前之窘狹而憂裕于永感之餘此古今之通恨而皐魚所以泣哭而死者風木之言

千載流涕予少而讀之未嘗不為之廢卷而況于今日
也陽曲張侯尚德既喪其二親而來令吾邑追思不已
形諸誦言邑縉紳聞而為之詩以泄其哀悲名之曰風
木興思而以屬予序嗚呼予尚忍序是詩哉雖然不可
以予故而拂侯之情以重其悲也蓋侯之先人容庵公
惇敏慈孝厚宗族而惠比鄰其言行皆可為鄉邦表式
而侯母湯孺人篤于教子脫簪珥為侯買書繼母賈孺
人撫侯兄弟若己出而以嚴飾愛督其弛而戒其盈有

丈夫所不及者湯既早亡而賈與容菴及侯之成名相繼淪逝雖膝前之奉未至於窘狹而南來風景其有觸於中者多矣此臯魚之嘆所由興而諸君之詩所由以作與雖然吾又有聞焉君子于親之存也致力於孝而移以事吾君於親之沒也致力於忠而推以榮吾親蓋知其不可兩全而求自致於其一此固聖人之所許而人之親亦以是望其子也張侯誠篤豈弟而為政有經將來所至殆未可量則所以孝其親者有大焉而豈徒

為魚之悲也哉予不忍序是詩而重傷侯之志遲回數月而終不能文思永感之人所以求盡其心者無以易此也於是乎言蓋外以為侯慰而私亦以自解云

北堂永日詩序

孟子曰君子有三樂而王天下不與存焉歷數之則以父母俱存兄弟無故為之首夫父母之俱存兄弟之無故閭里之人類有之而何為其擬於有天下者之樂也天地間豐厚淳全之氣其聚也有時而以其全畀人亦

造物者之所甚靳窮簷鄙屋之間骨肉團聚終其身不知以為福功名之蓋世富貴之鼎來人望而艷之矣而劬勞終鮮之感或交棘于其中據當時之喧赫而無論其他誠有如前之云者苟即其所安而使於窮簷鄙屋之人兩易其所處吾恐其有此欲焉而彼難之者矣充是心也則雖王天下亦何以加此哉吾嘗即是而觀天下之人當永感之餘與居具慶之下者其心之甘苦何啻藥礮於是焉不幸之中有一日之歡可偏承於膝下

則其遑遑汲汲宜又何如而為之黨者可無以助之邪
鄉進士吳生子南喪其父一聞翁獨奉其母黃孺人以
居今年壽七十夏六月十七為設悅之辰子男痛一聞
之不可作而幸孺人之康寧也將乞詩縉紳及是辰稱
慶于堂下以予當北上不及與茲會也豫請為之文夫
子南所謂有一日之歡可偏承於膝下者雖其視具慶
有間焉而抱痛終天之人欲以易子南之一日其又何
可得邪故諸君聞子南請競為之操筆而予于此雖甚

戚而不忍辭焉造物者之於福澤固靳以其全畀人而於善人亦未嘗不加之意一閒之為人博大深厚宜有遐福而不永其年孺人之賢由僮隸而上恩感誠孚無間言者而孀居以來幾二十年扶植其家門經紀其內外劬苦辛勤亦云至矣乃獲見其子之成名以享有今日則天於孺人亦不可謂無意者子南質性醇美類其先人而又輔之以問學發之以文辭揚名顯親可計日待今茲之舉乃其遑遑汲汲之至情求自致于一日者

惜予哀苦之餘觸事悽愴雖強為之說而終無以助發其歡聲也雖然以予之悽愴而幸其猶有及焉則所以承歡恨日之不足而何假予言哉詩之目曰北堂者孺人之所治曰永日以識其時而因以為祝也

送曹西山詩序

富林曹氏以詩書冠冕望于吾鄉而九峯定菴兩先生及吾十峯司憲名尤著西山君定菴之弟而十峯之兄也早承厥考後村翁之教讀書力本不售于時而敦樸

謹靜無世俗澆淺浮靡之習鄉人皆愛敬之今年秋來
視司憲于京邸四方之人士與司憲游者目君之為人
亦無不敬且愛之於其還競為詩以贈予得侍定菴最
久與十峯游最習且辱同升其於君非直四方之人士
傾蓋于一時者比也故為引其端歸舟在門羣從咸集
叙暄涼無恙外為我謝定翁鴻冥碧霄醺雞蟻蠓起滅
瓮盎有能捩杖屨相從于九山烟靄間不知能許之乎
否也

汾水飛雲圖詩序

汾水飛雲圖一幅詩若干首朝之縉紳為都諫張君汝霖思其尊人汾陂翁及其母韓而作也望飛雲而思親起于唐狄公仁傑而後之詩人賦人子之思親者以之梁公仕并州而親在河陽張君仕京華而親在汾水并與汾皆在今山西於古皆晉國則賦張君之思親而取梁公之事尤近也汾陂翁敏悟特達蜚英庠序間視一第真土芥可俛拾耳志弗獲遂而以銓授縣曹居汶上

七年有惠愛當途方器任之而汝霖學成舉于鄉遂幡然來歸老汾陂之上于今餘十年其有以自樂矣汝霖擢科名官禁閹居清履要以古道自持天下之人想聞其風采而推汾陂翁之善教上亦為錫翁命為吏科左給事中配韓為孺人並顯榮矣然而晨昏之養十餘年間汝霖之所以自致者終闕如也而今年翁壽且七十朋尊之享又弗獲躬焉此飛雲之感所以益切而諸公之賦詠所由以發歟予鄉友王君景昭於君為同年數

稱君之賢予蓋慕焉而未獲與之游諸公之有作予亦未及而景昭以君來視予且屬予序之琳琅珠貝炳耀後先吁其盛矣而予何以加之且詩之盛莫過于唐梁公之事史書之後世稱之而在當時若沈宋燕許諸君尤所謂以詩名者風雲月露嘲咏殆遍而公之事無述焉豈不聞之邪將有言而弗傳也而君于此既得之又使予序之序不序不足為重輕而詩之傳必矣則夫升金臺而想橫汾與登太行而望河陽者後之人將不以

並稱哉情之感發于一時而名之傳乃並于先哲汝霖之壽翁有出于翰藻丹青之外者矣諸君之為此頌也而有規寓焉予故繹而申之固將以梁公而望君也

武舉錄序

正德九年春上既親策進士于廷遂詔有司試武舉士夏四月太子少保兵部尚書臣陸完等具條格以聞蓋三年春上所定也越壬寅試騎射乙巳試步射完等莅之戊申試文三道則命侍讀學士臣清中允臣詠主焉

既乃與都給事中臣陽春臣金郎中臣果臣文祥等參
互考校取射之及格與文之中程者六十人錄其氏名
又擇其文之優者六篇刻之以獻以傳示於天下武舉
之文至是凡再錄蓋真與文科並矣臣切惟我國家奄
有四海幾百五十年高皇帝汛掃寰區定鼎凝命文皇
帝驅駕英豪揮斥羣孽天下大定尊用儒術表章六經
海內風動而講武練兵曾不少廢列聖五朝一德相承
以至于我孝皇仁涵義濡十有八年羣生休和不見兵

革於乎盛矣皇上繼之以英武之資撫盈成之運治極而熾陰妖孽牙潢池竊兵氏羌闕間雖捷書日奏而邊警猶嚴斯亦古之賢王拔足拊髀揖酈生而想頗牧之時也然則上之所以甫畢文科即詔選武而公卿大臣所以奔走而承事者豈徒尚彌文修故事為治飾美觀而已哉諸君之登名者非世胄之英即良家之彥平居無事固嘗鳴劍抵掌馳志伊吾而況在今日以具雄毅果敢之姿文之以禮樂詩書之懿加以以感恩思報之

心以赴千載功名之會則其戮力效忠宜又當何如邪
清書生也未嘗知兵既濫司校理則於諸君有一日之
故命題發策蓋嘗寄微意于其間欲其采覽前聞求古
賢將之用心與國家所以登延之意入則利國出則使
民為明天子保億萬年全盛之治諸君亦既知之矣其
果能加之意乎用敢于撤棘之晨申以為終篇告惟諸
君其念之哉知是舉者尚書臣完左侍郎臣珂同知則
太子太傅成國公臣輔太傅定國公臣光祚太保會昌

侯臣銘太傅兼太子太傅新寧伯臣祐廣寧伯臣佶右
侍郎臣玉監試則御史臣奎臣縉提調以下凡執事並
列名左方

夫人朱氏六十壽序

少師西涯公之配封一品夫人朱氏今年壽六十嗣子
尚寶司丞兆蕃從子中書舍人兆延將以其生辰稱慶
堂下夫人之壻尚寶少卿崔君世興得善繪者為瑤臺
仙子圖以示于同門擬作詩助蕃延為壽而以其事屬

清曰子宜書往歲公壽六十時諸生在門者有蓬山永
畫詩流聞四方傳以為一時盛事時清以家居不與也
今八年而夫人壽亦登茲清又適在門而崔君重有命
焉其敢以不文辭清惟自古王公大人任天下之重而
能專意國家克樹立其勲業流聲光于無窮者其中必
有賢妃淑媛協德同心以為之輔佐而魚軒象服珮玉
鳴環侈彤管之書而通長樂之籍者亦必其人有以稱
乎是而天始畀之西涯公碩德重望光輔兩朝為國元

老功業在社稷聲名在天下而清約簡素不改平生此
自公之高致而夫人家世六侯貴富兩極乃能釋去紛
麗躬履儉節與公相表裏四十年來俯育仰承恩洽禮
際所以成一家之政者不知視桓少君為孰多至于思
滿戒盈以退為進贊公之決以逸公老而增其令名則
自東郭生妻老萊婦之後知其不數人也以昔準今詢
事考類則天之所以厚夫人者夫寧有窮已哉且夫六
月長夏朱明麗空百物嘉美日之初六彭鏗降誕之辰

也而夫人實懸悅焉得氣之盛與數之長又孰有過于此者夫然則夫累錫重封崇極九命榮華尊寵安享百年皆夫人所宜固有而豈華門蓬巷匹士寡妻倖富貴於一朝玩隙光于俄頃者可同日語哉尚寶中書懷撫鞠之深愛顧祿秩之自來所以悅其心娛樂其志固有不間于晨夕者而今日衣冠滿庭歌頌間作凡皆為二君來也夫人之心寧不於此而一樂邪神仙之有無不可質信而崑崙瑤圃荒忽緬邈亦難以形似求之若夫

人之盛德而獲壽中書尚寶與崔君之致孝而承歡可
以式閨門而厚風教者則不可以無述也敢再拜而書
之不知我公見之亦將為一莞然否也

西城雅會詩序

冬孟十日吾郡守喻侯夜過予西軒司憲十峯曹君繼
至因共小酌時菊花盛開十峯舉燭臨之愛玩不置曰
古人以燭照海棠未聞照菊此風致不可無述也首倡
為近體詩四韻索予和之又明日會十峯宅後出四韻

予亦和之其後周侍御伯明盧侍御師邵施侍御聘之
輦聞之亦皆有作題之曰西城雅會十峯屬予書其端
自兵興數年所在多事衣冠游賞之趣雖京師不免落
莫喻侯莅吾松當凶荒疾癘之餘補葺撫摩盡瘁畢力
不三年漸復承平之舊其來考績也吾人之見之者皆
欣欣焉而侯文雅豈弟喜清約而厭紛奢人亦樂以親
之賞菊之會本自吾家非有京洛園池之美清談賦詩
非有梨園伎樂之盛而一時人情物態歡鬯怡懌略於

此見之舉一方以觀天下則是詩也不可以其寂寥數章而以為無所繫也遂書以歸之十峯之兄定菴翁閒居林下最善吟侯歸以示之或以予言為然以倡于鄉人其將復有作也予安得與十峯倚而歌之

太傅新寧伯七十壽序

昔我高皇帝應運龍飛長淮以南泗濠滁廬數千里間豪傑並興景附雲從共濟洪烈以至于文皇因其遺材入正大統天下既定疇功顯庸錫號祚土伯侯公王圭

組蟬聯而其子孫又多忠孝敬慎克荷厥勲以當于天心百五十年繼繼承承莫或替圯昔漢高起豐沛定天下同符我朝元功之封鐵券丹書藏之盟府事亦相類然其後不一再傳或絕或微聲消迹沈唐之太宗雪恥除兇房杜英衛之功為最而其後嗣類皆不肖蹈其氏名以視我明寧不亦少愧哉太傅兼太子太傅雲谿譚公其先故滁人也高曾二祖有功洪武永樂間世昨新寧爵第三等公髫年承廕歷事五朝幾六十年中間持

節將命握符統兵出入兩京更踐四府委任之隆重寵眷之優渥自太師英公而下莫或班焉若在往年邊徼犯順命將徂征每當公受任寇輒遠遁蓋兵嚴而不出者三人尤以為異而公文雅謙退恂恂若書生初不知爵位之崇高威望之隆赫也然則朝廷之所以重公而公之享有祿位保其功勲皆理所宜有而豈漢唐之世倏興而忽滅者所得擬哉公今年壽七十春二月九日實公嶽降之辰公侯而下咸集其第舉觴稱慶而介陽

武侯薛公屬予為之辭予承乏講官經筵之事公實知之不可謂無一日之素而元臣碩輔壽考康寧又非一人一家之慶也故為之推本而言之方今海內雖平而犬羊狐鼠之羣猶有跳梁于疆場之外者彈壓折衝繫公是賴石渠金馬之間且將有叙麒麟之勲而贊凌烟之像聳我明威德於無前者而區區日月之祈又不足為公道也公名祐字元助雲谿其別號云

南村歸興詩序

南村歸興詩者送劉先生文瑞而作南村其所居而因以自號者也先生自京歸南村者屢矣其始被薦來當弘治癸丑謁告省其親諸君賦詩送之予時為之序不言歸興者望其即來也丙辰再至而先生親已老因以疾歸蓋將終其身矣而諸君之望其來者猶未已也及是親既終多勸之行而周氏甥男從母入京師先生念其幼也為護視以來而功名之念泊如矣既至訪諸故人外閉門却掃日走价索諸君詩曰吾待是以行不者

吾無事于此也曹君乎若因勑為此題以明先生之志
題之下又為十題自京師以至鄉國皆摘其山川風景
古今人物事之可紀者各賦一詩以發先生之興予亦
為絕句十章其餘或專賦一題或全用曹韻不數日而
皆成先生復俾予序蓋予至是三送先生歸而為之序
者再矣先生篤學慎行宜有以自見于時亦既名薦章
參選部矣趙趙前却竟不以終身之榮易一日之養人
皆為之惜而未嘗有一介于中今之來其精神猶壯茂


也而逃名藏聲日思速去雖其壻御史君不能留而所
為眷眷者獨在於文墨翰藻之間也先生之為人於是
可見而其歸也殆若風鵬雲鵠出埃壒而翔于紫冥豈
復可攬而羈哉嗟乎先生行矣予何時飄然得從君後
塵相與杖屨南村中數平生之游歷以及今日之事望
上林臺殿於煙霏縹緲間且相詫曰吾二人其從天而
下也既為之序遂以所賦詩系之左方

壽筵列詠序

朝之縉紳為兵科給事中王君明遇壽其父栗齋先生
賦詩十篇篇各一題題各一事皆櫟括先生之履歷與
明遇之意為之其曰楚天一鶚者先生成化庚子薦湖
南湖南楚地先生自此入中朝凌雲厲空始于一舉志
之也既而上春官連不利孝皇初政始推擇為中書舍
人侍雍王于京邸天人之對闊焉故繼之以瀛海遺珠
惜之也中書舍人之職今略變于古而官清地近實異
羣僚徽省之吟花螭坳之載筆猶故典也雍開國于衡

沅湘嶽麓屈正平賈誼之所周旋南軒考亭兩夫子過
化之地皆有轍跡焉擬賦懷賢正衡游事也雍國除上
進先生為德王傳德封濟南密邇洙泗魯殿之詩書孔
堂之絲竹則山東事也先生今年壽六十一諸子孫侍
行者八人明遇獨官闕下不得預稱觴之列詩為是作
故以斑衣青瑣之說終焉倡始于侍御周君伯明題則
予所共擬伯明以其首屬予而分其餘諸君題雖異事
而託以為翁壽一也故總明之曰壽筵列詠伯明又以

諸君識先生晚或于其出處未詳焉而明遇嘗從予游
短章寂寥未見其親于衆也請疏其所以揭之卷端嗟
乎先生起賢科官禁從歷事賢王居贊翊之地子孫滿
前而鳳林遺羽又有如明遇者聯飛繼美又未可量焉
非厚德何以致此詩之頌先生者九而惜之者一不知
其一正先生所以貽後人而有今日也先生聞之其將
輟然而一笑乎



東江家藏集卷十九